

Siunnersuut uunga: Qaffasinnerusumik ilinniartitaanerit pillugit Inatsisartut inatsisaat nr. xx, xx. xxx 2018-meersoq

(Ilinniartitaanerimut, Kultureqarnermut, Ilisimatusarnermut Ilageeqarnermut Nunanut Allanullu Naalakkersuisoq)

Saqqummiussissut

Siullermeerinnineq

Naalakkersuisut sinnerlugit matumuuna Qaffasinnerusumik ilinniakkat pillugit Inatsisartut inatsisissaattut siunnersuut saqqummiuppara.

Siunnersuut Ilisimatusarfik pillugu Inatsisartut inatsisissaattut siunnersuummut aamma Inuussutissarsiutinik ilinniartitsinerit aamma inuussutissarsiutinik pikkorissaanerit ilinniartitsinerup iluani pillugit Inatsisartut inatsisaata allanngortinnissaanut siunnersuummut, aammattaaq ataatsiniinnermi matumani oqallisigisassatut saqqummiunneqartunut, atatillugu isiginiarneqassaaq.

Ilisimatusarfik pillugu Inatsisartut inatsisissaattut siunnersuummi ilaatigut aqutsineq aningaasaqarnerlu pillugit aalajangersakkat atatiinnarlugit ingerlateqqinneqarput, ilinniakkalli pillugit aalajangersakkat siunnersuummi matumani ingerlateqqinneqarlutik. Siunnersuummi matumani ingerlaqqiffiusumik ilinniakkat Kalaallit Nunaanni neqeroorutaasartut tamarmik malittarisassiuunneqarput, ilinniartuup sorliup neqeroortuunera apeqqutaatinnagu. Tamanna siunertamat naapertuuttut isigineqarpoq, malittarisassat assigiissarumallugit, tassuunakkullu ilinniartunut paasiuminarnerulersikkumallugit. Tamatuma kingunerisaanik ilutigisaanillu siunnersuutigineqarpoq Inuussutissarsiutinik ilinniartitsinerit aamma pikkorissaanerit inuussutissarsiutinik ilinniartitsinerup iluani pillugit Inatsisartut inatsisaanni qaffasinnerusumik ilinniakkat pillugit aalajangersakkat atorunnaarsinneqassasut.

Siunnersuutip immikkoortuani siullermi ilinniakkanut tunngasumi ilaatigut pineqarput neqeroortarneq aamma ilinniarfissanik aqutsineq, ilinniakkat imaat siunertaallu, ilinniakkat aaqqissugaanerit kiisalu pitsaassutsimik qularnaarineq. Nutaatut aalajangersarneqarpoq ilinniakkat aaqqissugaaneri taakkunanilu allannguutit pingaarutillit Naalakkersuisunit akuerineqartassasut. Tamatumuuna qularnaarneqassaaq Naalakkersuisut qaffasinnerusumik ilinniakkanik ataqatigiissakkanik aaqqissuussinissaat, piumasarineqartut piviusunngortinneqarnissaat aamma ilinniakkat ullutsinni pisariaqartitanut, pitsaassusissamik piumasaqaatinut inuiaqatigiinnilu pissutsinut naapertuuttuunissaat.

Inatsisit atuuttut naapertorlugit atorfinissutaasinnaasumik bacheloritut ilinniakkat nalinginnaasumillu bacheloritut ilinniakkat immikkoortitaapput. Taamatut immikkoortitsineq siunnersuummi ingerlateqqinneqanngilaq, tamatumunngalu pissutaavoq ilinniakkat malunnaatillimik assigiinngissuteqarunnaarsimanerat, aamma nunat tamat akornanni ineriartornerup malunnarsisimmagu taamatut immikkoortitsisarneq atorunnaarneqariartortoq.

Aammattaaq siunnersuummi aalajangersarneqarpoq qaffasinnerusumik ilinniakkat pitsaassusaat qularnaarneqartassasut periutsit nunat tamat akornanni atugaasut naapertorlugit, aamma Naalakkersuisut ilinniakkat pitsaassusaannik qularnaarisarnissaq pillugu

malittarisassanik aalajangersaassasut. Malittarisassat suli suliarineqanngillat, kisianni malittarisassat qularnaassavaat, Kalaallit Nunaanni ilinniarsiit ilinniakkallu piffissap ingerlanerani pisortatigoortumik nunat tamat akornanni akuerisaanissaat.

Tulliupput qinnuteqartarnej aamma ilinnialersinnaasunik killilersuineq kiisalu ilinniartunngortitanut inissaqartitsinissat pillugit aalajangersakkat. Tamatuma inatsisitigut malittarisassiuunneqarnera annertunerusutigut nutaajuvoq.

Aamma nutaatut siunnersuutigineqarpoq bacheloritut ilinniakkani tamani ilinniartut ilinniarnermik ingerlanerani Kalaallit Nunaata avataani ilinniarallartassasut. Tamatuma ilinniartut piginnaaneqarlualersillugillu inerikkiartortissavai. Aalajangersakkamik sanioqqutitsisinnaaneq periarfissaqarpoq, tassami pissutsit immikkut ittut pissutigalugit ilinniartoq nuna qimallugu aallarnissamut periarfissaqanngitsoorsinnaavoq. Aammattaaq ikaarsaariarnermi aalajangersagaq ilanngunneqarpoq, piomasagaammut pineqartumut naleqqiullugu ilinniarsiit ilinniartullu piareersarnissaminnut piffissaqarluarnissaat siunertaralugu.

Siunnersuut naapertorlugu Naalakkersuisut qaffasinnerusumik ilinniakkani ilinniartitsisut piginnaasassaannik piomasagaatit pillugit malittarisassanik aalajangersaassapput. Malittarisassani pineqassapput ilinniakkatigut piomasagaatit, piginnaanngorsarnissamut periarfissat ilinniaqqissinnaaneq il.il. Ilinniartitsisut piginnaasaannut tunngatillugu piomasagaatinik aalajangersaanikkut naatsorsuutigineqarpoq, ilinniartitsisut piginnaaneranut tunngatillugu piomasagaatit sukateriffigineqassasut, tamannalu pisariaqartutut isigineqarpoq nunat tamat akornanni ineriartornermut malinnaanissaq aamma pitsaassutsimik piomasagaatit annertusiartortut ilisimatusarnermillu tunngaveqarnissamik piomasagaatit maleruarnissaat siunertaralugu.

Taamatut oqaaseqarlunga siunnersuut inussiarnersumik Inatsisartunut oqallisigisassanngortippara.